

Hjarðarbyggð
Hafnargötu 2
730 Reyðarfjörður



UMHVERFISSTOFNUN

Reykjavík 26. júní 2015
UST201506-134/S.P.
11.09

Efni: Umsókn um leyfi til refaveiða í Hólmanesi

Umhverfisstofnun hefur borist umsókn frá Guðjóni Guðjónssyni, ráðinni refaskyttu í Reyðarfirði og Fáskrúðsfirði, um leyfi til þess að eyða ref í fólksvanginum Hólmanesi, dagsett 29. maí 2015.

Frá árinu 1973 hefur Hólmanes verið friðlýst bæði sem friðland og fólksvangur sbr. auglýsingu í Stjórnartíðindum B, nr. 393/1973. Um fólksvanginn og friðlandið gilda samræmdar reglur. Eitt af markmiðum friðlýsingar í Hólmanesi er að koma í veg fyrir óþarfa truflun á dýralífi. Þannig má nefna að meðferð skotvopna er óheimil á svæðinu, nema með sérstöku leyfi Umhverfisstofnunar.

Um refaveiðar gilda lög nr. 64/1994 um vernd, friðun og veiðar á villtum fuglum og villtum spendýrum. Markmið þeirra laga er að tryggja viðgang og náttúrulega fjölbreytni villtra dýrastofna, skipulag á veiðum og annarri nýtingu dýra, svo og aðgerðir til þess að koma í veg fyrir tjón sem villt dýr kunna að valda. Refir hafa lifað á Íslandi frá landnámi og hafa refaveiðar verið stundaðar í einhverjum mæli allt frá því að land byggðist. Markmið refaveiða á Íslandi er fyrst og fremst að koma í veg tjón af völdum refa.

Í fólksvanginum Hólmanesi eru tvö þekkt greni. Samkvæmt umsókn er óskað eftir eyðingu refs á svæðinu þar sem ljóst sé að „hann muni fjölga sér og hafa áhrif á fuglalíf.“ Ekki liggja fyrir gögn sem sýna fram á að tjón hafi þegar orðið á svæðinu af völdum refa. Samkvæmt upplýsingum sem Umhverfisstofnun aflaði, meðal annars hjá þeim sem nytja æðavarp á svæðinu, hafa refir ekki valdið tjóni á æðarvarpi á svæðinu.

Náttúrustofa Austurlands hefur gefið álit sitt á umræddum refaveiðum í fólksvanginum í Hólmanesi, dagsett 11. júní 2015. Er það mat Náttúrustofu Austurlands að ekki sé ástæða til þess að veiða ref í fólksvanginum og friðlandinu í Hólmanesi út frá vistfræðilegum sjónarmiðum. Bendir Náttúrustofa Austurlands meðal annars á að Hólmanes sé vinsælt útivistarsvæði og að vitneskja um greni, refi og yrðlinga á svæðinu geti verið aðdráttarafi fyrir bæði innlenda og erlenda gesti og gætu refaveiðar haft neikvæð áhrif á ímynd svæðisins þar sem ósnortin náttúra og dýralíf eru stór hluti af upplifun gesta.

Samkvæmt framangreindu hefur Umhverfisstofnun komist að þeirri niðurstöðu að ekki sé þörf á því að eyða ref á friðlýsta svæðinu í Hólmanesi að svo stöddu þar sem upplýsingar benda ekki til að tjón hafi orðið af hans völdum á svæðinu. Umhverfisstofnun telur þó mikilvægt að áfram verði fylgst með stofnstærð refsins á hinu friðaða svæði og þeim vistfræðilegu afleiðingum sem breyting á stofnstærð hans gæti haft í för með sér.

Umhverfisstofnun bendir á, að samkvæmt 3. ml. 1. mgr. 74. gr. laga nr. 44/1999 um náttúruvernd, sbr. 26. gr. stjórnsýslulaga nr. 37/1993 er heimilt að kæra ákvörðunina til umhverfis- og auðlindaráðherra.

Virðingarfyllst,

Sigrún Ágústsdóttir
Sviðstjóri

Svava Pétursdóttir
Sérfræðingur